

Broj: 423-1/23

Datum: 12.06.2023. godine

Na osnovu člana 21 a. Zakona o zaštiti ličnih podataka ("Službeni glasnik BiH", broj: 49/06, 76/11 i 89/11) i člana 34. Statuta JP "ONSA" d.o.o. Sarajevo, Direktor Preduzeća *donosi*:

P R A V I L N I K **O SISTEMU VIDEONADZORA U JP "ONSA" D.O.O. SARAJEVO**

I PREDMET PRAVILNIKA

Član 1.

Pravilnikom o sistemu videonadzora u JP "ONSA" d.o.o. Sarajevo (u daljnjem tekstu: Pravilnik) bliže se određuje uspostava, pravni osnov, svrha, upotreba sistema videonadzora objekata i prostorija JP "ONSA" d.o.o. Sarajevo, pravila obrade i korištenja podataka i opseg podataka.

II ODLUKA O SISTEMU VIDEONADZORA

Član 2.

Direktor JP "ONSA" d.o.o. Sarajevo donosi odluku o uvođenju sistema videonadzora JP "ONSA" d.o.o. Sarajevo.

Član 3.

Bliže odredbe o uspostavljanju, svrsi, upotrebi, zaštiti i obradi ličnih podataka i završnim odredbama vezanim za videonadzor definišu se ovim Pravilnikom.

III ZAKONSKI OKVIR

Član 4.

Zakon o zaštiti ličnih podataka Bosne i Hercegovine član 21.a predviđa uspostavu sistema videonadzora.

IV SVRHA SISTEMA VIDEONADZORA

Član 5.

Svrha uspostavljanja sistema videonadzora je:

- povećanje sigurnosti uređaja i opreme u krugu i objektima Preduzeća,
- povećanje sigurnosti materijala i opreme u skladištima Preduzeća,
- povećanje sigurnosti novčanih sredstava u blagajni Preduzeća,
- povećanje sigurnosti radnika na blagajni Preduzeća i u krugu Preduzeća,
- povećanje sigurnosti korisnika usluga koji se zadese u objektima Preduzeća,
- povećanje sigurnosti radnika Preduzeća koji rade van redovnog radnog vremena Preduzeća (noćni sati, vikendi, neradni dani i praznici),
- povećanje sigurnosti ljudi i imovine na izdvojenim objektima Preduzeća.

V OPSEG PODATAKA VIDEO NADZORA

Član 6.

Sistem videonadzora obuhvata:

1. Unutrašnje kamere i vanjske kamere.
2. Nadzorne kamere imaju IR noćno snimanje i osjetljive su na pokret.
3. Uređaje za pohranu videozapisa koji deponuju i arhiviraju videozapise u trajanju maksimalno 15 (petnaest) dana.

Vrsta podataka koji se prikupljaju i pohranjuju je video zapis sa datumom i tačnim vremenom dešavanja.

Član 7.

Unutrašnje kamere pokrivaju sve prostore koje koriste korisnici usluga.

Na ulazu u svaku od prostorija pokrivenih videonadzorom iz stava 1 ovog člana obavezno stoji istaknuto upozorenje "Prostorija pod videonadzorom".

Član 8.

Vanjske kamere pokrivaju ulazne kapije Preduzeća i izdvojenih objekata, komunikaciju od kapija do objekata, krug ispred i oko objekata, ulaze u objekte.

Član 9.

Znak na ulazima Preduzeća sadrži i kontakt telefone preko kojih se mogu dobiti opće informacije o videonadzoru.

VI UPOTREBA PODATAKA (SPECIFIČNOSTI OBRADJE LIČNIH PODATAKA)

Član 10.

Uređaji za snimanje (hard disc-ovi) i administrativni centar kontrole i obrade podataka nalazi se u zaključanom ormaru glavnog servera Preduzeća, koji se nalazi u prostoriji Recepcije.

Glavni vršilac i rukovodilac nadzora je Direktor Preduzeća koji jedini posjeduje ključ serverskog ormara. Niko drugi, osim Direktora, nema pristup uređaju za snimanje.

Direktor Preduzeća, svojom odlukom, može ovlastiti nekog od radnika Preduzeća da ima pristup sistemu videonadzora (u realnom vremenu ili pristup arhivi podataka) u svojstvu obrađivača podataka.

Član 11.

Kontrolor sistema videonadzora je Direktor kao odgovorno lice. Kontrolor je odgovorno lice koje ima pristup monitoringu u realnom vremenu i arhivi videonadzora, te može slobodno da pristupa podacima i obrađuje podatke videonadzora u skladu sa članom 21.a Zakona o zaštiti ličnih podataka Bosne i Hercegovine.

Podacima u smislu stava b) ovoga člana ovlašteno lice, u skladu stava a) ovoga člana, ima mogućnost praćenja u prostorijama Preduzeća ili putem IP veze sa druge lokacije ili mobilnog uređaja.

Snimljeni materijal se ne može koristiti niti u jednu drugu svrhu osim za potrebe zaštite ljudi i imovine Preduzeća.

Član 12.

U incidentnim situacijama pristup snimljenim podacima može se dati i ovlaštenim policijskim agencijama i ministarstva unutarnjih poslova BiH, uz predočenje validnog naloga.

Da bi se video zapis dao nadležnom organu na uvid potrebno je da su ispunjeni sljedeći uvjeti:

- Da se desila incidentna situacija vezana za ugrožavanje sigurnosti imovine ili zdravlja ljudi,
- Da je nadležni policijski organ podnio pismeni zahtjev za omogućavanje pristupa video zapisima sa jasno određenim vremenskim razdobljem za koji traži pristup video zapisima,
- Da u arhivi snimljenog materijala postoji video snimak u traženom vremenskom razdoblju.

VII ZAŠTITA LIČNIH PODATAKA

Član 13.

U skladu sa članom 21.a Zakona o zaštiti ličnih podataka Bosne i Hercegovine obezbjeđuje se zaštita i obrada ličnih podataka prikupljenih putem videonadzora:

- Snimci pohranjeni putem videonadzora na osnovu kojih se može identificirati nosilac podataka predstavljaju zbirku ličnih podataka.
- Kontrolor je donio odluku u okviru koje je odredio pravila obrade s ciljem poštivanja prava na zaštitu privatnosti i ličnog života nosioca podataka,
- Kontrolor će na vidnom mjestu istaći obavještenje o vršenju videonadzora i kontakt putem kojeg se mogu dobiti pojedinci o videonadzoru.
- Tehnička zaštita ličnih podataka je osigurana na način da se uređaj za pohranu video zapisa nalazi u zaključanom serverskom ormaru a ključ od istoga se nalazi samo kod Direktora Preduzeća. Zaštita same prostorije u kojoj se nalazi serverski ormar je osigurana putem protuprovalnog alarmnog sistema.
- Direktor, kao ni bilo koja druga osoba, ne smije koristiti podatke o osobama prikupljene sistemom videonadzora zaštite izvan njihove zakonske namjene, a raspolaganje snimkama dopušteno je samo Direktoru Preduzeća.
- Brisanje video zapisa sa uređaja za pohranu se vrši automatski, programirano brisanje svakih 15 (petnaest) dana.

Član 14.

Evidencija nad zbirkom ličnih podataka u smislu tehničke izvedbe sistema videonadzora (arhivski videozapisi) definiše se članom 13. Zakona o zaštiti ličnih podataka Bosne i Hercegovine.

Evidencija nad zbirkom ličnih podataka nalazi se kod Direktora Preduzeća.

Evidencija iz stava 2 ovoga člana sadrži obrađene lične podatke koje kontrolor procjeni da bi mogli biti od značaja u skladu sa članom 6. ovog Pravilnika.

Član 15.

Pravilnik podrazumijeva poštivanje člana 30. Zakona o radu u Federaciji Bosne i Hercegovine, koji se odnosi na postupanje sa ličnim podacima radnika.

VIII PRELAZNE I ZAVRŠNE ODREDBE

Član 16.

Ovaj Pravilnik stupa na snagu 8. (osmog) dana od dana objave na oglasnoj ploči Preduzeća.

Član 17.

Javnost se upozna sa sadržajem ovoga Pravilnika putem službene web stranice Preduzeća.

Pravilnik o sistemu videonadzora će biti objavljen na oglasnoj ploči Preduzeća dana 13.06.2023. godine, a stupa na snagu dana 21.06.2023. godine.

Dostavljeno:

1. Službama,
2. Web stranica,
3. Oglasna ploča,
4. Arhiva



Direktor
Anel Tahirbegović